


## SI JESUS ANG ANAK NG DIYOS



**Sa Araling Ito'y Pag-aaralan Mo**

**Ang Anak at ang Kanyang Ama**

Walang hanggang kaisahan ng Ama at Anak  
Pagkilala ng Anak sa Ama  
Pagkilala ng Ama sa Anak

**Ang Anak at ang Kanyang Mga Tagasunod**

Pagkilala ng mga tagasunod sa Anak  
Pagkilala ng Anak sa mga tagasunod  
Walang hanggang kaisahan ng Anak at ng  
mga tagasunod

Si Jesu-Cristo'y Anak ng Diyos. Lubhang mahalagang matiyak kung ano ang pinani-niwalaan natin tungkol sa kanya. Siya'y higit pa sa isang taong mabuti, higit pa sa isang guro. Siya ang Cristo, ang Anak na tunay ng Diyos. Naniniwala tayo at natitiyak nating Siya ang Diyos na naparito sa sanlibutan sa anyong tao. Siya'y may kapangyarihang magpalaya sa atin mula sa kapangyarihan ng kasalanan at ng kasamaan.



### Ang Anak at ang Kanyang Ama

#### Walang Hanggang Kaisahan ng Ama at ng Anak

Bago ipinanganak sa Betlehem si Jesus, lagi na siyang kasama ng Diyos Ama. Sumulat si Mikas tungkol sa Mesias na isisilang:

**Mikas 5:2...** ang pinagbuhatan niya ay mula nang una, mula nang walang hanggan.

Nang gabing bago namatay si Jesus, ang dalangin niya ay ito:

**Juan 17:5.** Kaya, Ama, ipagkaloob mo sa akin ngayon ang karangalan taglay ko sa piling mo bago pa likhain ang sanlibutan.

Si Jesus ay kasama ng Diyos, gumagawang kasama Niya nang likhain ang sanlibutan. Tinawag ni Juan si Jesus na Salita at pinasimulan ang kanyang ebanghelyo sa pagsasabing:

**Juan 1:1-3.** Sa pasimula pa'y naroon na ang Salita. Ang Salita ay kasama ng Diyos at ang Salita ay Diyos. Sa pasimula pa'y kasama na siya ng Diyos. Sa pamamagitan niya nilikha ang lahat ng bagay, at walang anumang nalikha nang hindi sa pamamagitan niya.

Nakatutulong ito sa pagbibigay-linaw sa hiwagang lumilito sa maraming bumabasa ng Matandang Tipan. Kanino nagsasalita ang Diyos nang Kanyang sabihin? Lalangin natin ang tao ayon sa ating wangis? At bakit sinabi ng Diyos kay Isaias na ang Mesias na isisilang ay tatawaging Makapangyarihang Diyos, ang walang hanggang Ama?

Itinuturo ng Biblia na isa ang Diyos — ang Lumikha. Gayunman, Ang Matandang Tipan ay gumagamit ng pangalang pangmarami para sa kanya — Elohim — mahigit sa 2,700 ulit. Ang Elohim na isinaling Diyos, ay ginagamit na kasama ng mga panghalip na pangmarami at mga pandiwa upang ilarawan ang gawain ng Diyos. At ito ang ginawa sa paglalarawan ng paglalang. Kung minsan, ginagamitan ito ng pandiwang pang-isa na para bang mahigit sa isang tao ang kumikilos bilang isa. Ginagamit ng Biblia ang salitang isa upang ipahayag ang pagkakaisa o bilang. Ang pagkakaisang banal na tinatawag nating Diyos ay binubuo nang mahigit sa isang katauhan.

**Genesis 1:1,2,26.** Nang pasimula ay nilikha ng Diyos (Elohim) ang langit at ang lupa . . . at ang Espiritu ng Diyos ay sumasababaw ng tubig . . . At sinabi ng Diyos (Elohim), lalangin natin ang tao sa ating larawan, ayon sa ating wangis.



Habang nagpapatuloy ang pagpapahayag ng Diyos mula sa Matandang Tipan patungo sa Bago, matututuhan natin na ang tatlong persona (katauhan) ay tinatawag na Diyos — ang Ama, ang Anak, at ang Espiritu Santo. Tinatawag natin silang Trinidad,

na ang kahulugan ay Tatlong Persona sa iisang Diyos, o pag-iisa ng Tatlong Persona sa Iisang Diyos. Iisa ang kanilang layon, kapangyarihan, at katangian. Lagi silang gumagawang magkakasama at nagkakasundo. Ginawa nila ang sansinukob. Nangyari ito nang si Jesus ay narito sa lupa. At lalaging gayon. Ang ngalang Diyos, gaya ng apelyido, ay ginagamit para sa Ama, sa Anak, at sa Espiritu. Para makilala kung sinu-sino, ang Ama ay tinatawag nating Diyos, ang Anak ay sa panlupang ngalang Jesus, at Espiritu Santo ang pangatlo.


Tinukoy ni Jesus ang kaisahan Niya sa kanyang Ama, o na Siya'y nasa Ama at nasa Kanya ang Ama.

**Juan 17:21-23.** "Ama, kung paanong ikaw ay nasa akin at ako'y nasa iyo, gayon din naman maging isa sila sa atin, . . . kung paanong tayo'y iisa; ako'y nasa kanila at ikaw ay nasa akin."

Tinugon ng Diyos Ama ang dalangin ni Jesus na mababasa natin sa Juan 17:5. Matapos siyang mamatay para sa ating mga kasalanan, si Jesus ay binuhay na muli ng Diyos. Pagkaraan ng 40 araw, marami ang nakasaksi

nang magbalik Siya sa langit. At pinahintulutan ng Diyos na may ilang makakita kay Jesus doon sa piling ng Ama. Isa rito ay si Esteban.

Gawa 7:55. Nguni't si Esteban na puspos ng Espiritu Santo ay tumingnan sa langit at nakita ang maningning na liwanag sa paligid ng Diyos, at si Jesus na nasa kanyang kanan.



### Ang Gagawin Mo

1. Piliin ang tumpak na mga pangalan: Elohim, Mikas, Esteban, Jesus, Juan, Trinidad, Isaias.
  - a) . . . . . tinawag ang Mesias na makapangyarihang Diyos.
  - b) . . . . . sinabi niyang buhat sa kawalang-hanggan ang Mesias.
  - k) . . . . . ay isang ngalang pang marami sa Diyos.
  - d) . . . . . ay nangangahulugang Tatlong Persona sa iisang Diyos.
  - e) . . . . . binanggit si Jesus sa paglalang.
  - g) . . . . . nagsabing Siya'y kaisa ng Ama.
  - h) . . . . . nakita niya si Jesus na kasama ng Diyos sa langit.

### Pagkilala ng Anak sa Ama

Alam ni Jesus na ang Diyos ay Kanyang Ama at ipinabatid ito sa iba. Palagi niyang binabanggit na Ama Niya ang Diyos (kahit pa noong Siya'y 12 taong gulang.) Tinawag Niyang Ama ang Diyos sa Kanyang mga panalangin. Sinabi Niya sa mga tao na sinugo Siya ng Kanyang Ama upang bigyan ng buhay na walang hanggan yaong mananalig sa Kanya. Sinabi Niya:

**Juan 3:16.** "Gayon na lamang ang pag-ibig ng Diyos sa sanlibutan, kaya ibinigay niya ang kanyang bugtong na Anak, upang ang sumampalataya sa kanya ay hindi mapahamak kundi magkaroon ng buhay na walang hanggan."



Pinarangalan ni Jesus ang kanyang Ama sa pamamagitan ng pagganap ng ipinagagawa sa Kanya ng Diyos. Itinuro Niya sa mga tao na ang Diyos ay kahanga-hanga. Ipinaalam Niya sa kanila na ang kamanghamangha Niyang turo at mga himala ay galing sa Kanyang Ama.

**Juan 8:28-29.** "Wala akong ginagawa sa ganang sarili ko lamang; nagsasalita ako ayon sa itinuro sa akin ng Ama. At kasama ko ang nagsugo sa akin; hindi niya ako iniwang nag-iisa, sapagka't lagi kong ginagawa ang nakalulugod sa kanya."

### Ang Gagawin Mo

2. Isaulo mo ang Juan 3:16.
3. Anong pangalan ang ginamit ni Jesus para sa Diyos sa Kanyang mga panalangin? .....


## Pagkilala ng Ama sa Anak

Alam nating si Jesus ang Anak ng Diyos pagka't ito'y nilinaw na mismo ng Diyos. Pinanararangalan ng Diyos ang kanyang Anak. Sabi ni Jesus:

**Juan 8:18,54.** Nagpapatotoo rin ang Amang nagsugo sa akin . . . kung ako ang nagpaparangal sa aking sarili, ito'y walang kabuluhan. Ang aking Ama ang nagpaparangal sa akin at sinasabi ninyong siya ang inyong Diyos."

**Pinarangalan ng Diyos si Jesus at pinatunayang Anak Niya si Jesus sa pamamagitan ng:** 1) mga anghel, 2) Espiritu Santo. 3) di pangkaraniwang mga tanda.

**Mga anghel.** Sinugo ng Diyos ang mga anghel para sabihin sa mga tao na si Jesus ay kanyang Anak. Sinabi ng mga anghel kina Jose at Maria na ang Sanggol na isisilang ng isang dalaga ay Anak ng Diyos. Ipinahahayag ng mga anghel sa mga pastol sa parang ng Betlehem na sumilang na ang Tagapagligtas. Sa dalawang mabibigat na krisis sa buhay Niya, si Jesus ay



pinalakas at inalakayan ng mga anghel. Inalis ng mga anghel ang batong nakatakip sa libingan ni Jesus at sinabi sa kanyang mga tagasunod na Siya'y nagbangon. At nang tangga-



pin na sa langit si Jesus, napakita sa karamihan ang mga anghel. Sinabi nila na kung paanong umakyat sa langit si Jesus, gayon Siya babalik balang araw.

*Ang Espiritu Santo.* Ipinadala ng Diyos ang Espiritu Santo upang parangalan si Jesus at ipakilala Siya sa mga tao. Pinuspos ng Espiritu Santo sina Elizabeth, Zacarias, Simeon, Maria, Ana, at nangusap sa pamamagitan nila. Sinabi nila sa mga tao na ang Sanggol na Jesus ay Siyang Mesias. Pinuspos ng Diyos si Juan Bautista ng Kanyang Espiritu at sinugo upang ipakilala si Jesus bilang Anak ng Diyos at Kordero ng Diyos na nag-aalis ng kasalanan ng sanlibutan. Bumaba kay Jesus ang Espiritu Santo na parang kalapati nang Siya'y bautismuhan. Ang Espiritu Santo ang nagpahid ng langis kay Jesus para maglingkod bilang Mesias — ang Pinahiran ng Langis — puspos ng karunungan at ng kapangyarihan ng Diyos.





*Di pangkaraniwang mga tanda.* Gumamit ng maraming tanda ang Diyos para patunayang si Jesus ay Anak Niya. Isang bituin ang nanguna sa mga pantas patungo sa Sanggol na Jesus. Tatlong ulit na napakinggan ng mga tao ang tinig ng Diyos mula sa langit na pinararangalan si Jesus. Makalawang sinabi ng Diyos sa kanila:

**Mateo 3:17; 17:5.** "Ito ang minamahal kong Anak na lubos kong kinalulugdan."

Ang mga himalang ginawa ni Jesus ay pato-toong lahat ng Diyos na Siya ang Anak ng Diyos, gaya ng Kanyang sinabi. Ipinatanaw ng Diyos sa mga alagad ang kadakilaan ng Anak nang maganap ang tinatawag nating pagbabagong-anyo.

**Mateo 17:2.** Samantalang siya'y naroon, nakita nilang nagbagong-anyo si Jesus: nagliwanag na parang araw ang kanyang mukha, at pumuti na parang busilak ang kanyang damit.

Pinatunayan din ng Diyos na si Jesus ay Kanyang Anak nang ito'y mamatay. Lumin-dol, nagdilim, at nahati ang tabing sa templo.

Pagkaraan ng tatlong araw, pinarangalan ng Diyos ang Kanyang Anak nang ito'y buhayng muli. Pagkalipas nito, iniakyat sa langit si Jesus na nakikita ng maraming tao. Sa ilang pagkakataon din, may ilang nakakita kay Jesus sa piling ng kanyang Ama. Kung nananalangin ang mga alagad sa pangalan ni Jesus, tinutugon ng Diyos ang kanilang dalangin at nagaganap ang mga himala. Tunay na dapat paniwalaan ng lahat ng nananalig sa Diyos ang Kanyang patotoo tungkol kay Jesus.

### Ang Gagawin Mo

4. Isaulo mo ang sinabi ng Diyos sa Mateo 3:17.
5. Paano pinatunayan ng Diyos na si Jesus ay kanyang Anak?

Magtala ng tatlong paraan o mga pangyayari sa ilalim ng bawat isa:

a) Mga anghel ay lumitaw . . . . .

. . . . .  
 . . . . .

b) Espiritu Santo . . . . .

. . . . .  
 . . . . .  
 . . . . .

k) Di-pangkaraniwang mga tanda

. . . . .  
 . . . . .  
 . . . . .  
 . . . . .  
 . . . . .

## **Ang Anak at ang Kanyang mga Tagasunod**

Kung paanong kinikilala ng Ama at ng Anak ang isa't isa, gayon din ang kaugnayan ng Anak at ng Kanyang mga Tagasunod. Bunga ng ganitong pagkilala, tayo'y may walang hanggang kaisahan sa Anak ng Diyos.

### **Pagkilala ng mga tagasunod sa Anak ng Diyos**

Yaong sumunod kay Jesus nang Siya'y narito pa sa lupa ay nanalig sa Kanya. Kinilala nila Siya ayon sa Kanyang sinabi — na Siya ang Anak ng Diyos. At hayagan nilang sinabi sa lahat ang pananalig nila sa Kanya.

**Mateo 16:16.** Sumagot si Simon Pedro, "Kayo po ang Cristo, ang Anak ng Diyos na buhay."

**Juan 20:28.** Sumagot si Tomas, "Panginoon ko at Diyos ko!"

Tayo namang mga tagasunod ngayon ni Jesus, paano natin Siya kinikilala? Sa pag-anib sa iglesia? Dahil ba sa tayo'y tinatawag na Cristiano? Para maging tunay na Cristiano, kailangang manalig tayo sa Panginoong Jesu-Cristo — kilalanin Siya na Anak ng Diyos at Tagapagligtas natin. Paano natin ito gagawin? Isuko natin sa kanya ang ating buhay, magti-wala at sumunod tayo sa Kanya saan man Niya tayo akayin.

Sinulat ni Juan ang kanyang ebanghelyo upang patunayang si Jesus ang Anak ng Diyos, at nang magkaroon tayo ng buhay na walang hanggan sa pamamagitan ng pananalig sa Kanya. Sa kanyang mga sulat, inulit ni Juan ang pahayag ng Diyos na si Jesus lamang na Kanyang Anak ang tanging paraan ng pagkakamit ng buhay na ito.

**Juan 20:31.** Ang mga natala rito'y sinulat upang sumampalataya kayo na si Jesus ang Mesias, ang Anak ng Diyos, at sa gayo'y magkaroon kayo ng buhay sa pamamagitan niya.

**1 Juan 5:11-12.** Ipinagkaloob sa atin ng Diyos ang buhay na walang hanggan at ito'y makakamtan natin sa pamamagitan ng kanyang Anak. Ang pinananahanan ng Anak ng Diyos ay may buhay na walang hanggan, nguni't wala nito ang hindi pinananahanan ng Anak ng Diyos,

### Ang Gagawin Mo

6. Aling aklat ang sadyang isinulat upang tulungan tayong kilanlin si Jesus bilang Anak ng Diyos at tayo'y manalig sa Kanya?
    - .... a) Ang Ebanghelyo ni Mateo.
    - .... b) Ang Ebanghelyo ni Marcos.
    - .... k) Ang Ebanghelyo ni Lucas.
    - .... d) Ang Ebanghelyo ni Juan.
  7. Ayon sa 1 Juan 5:11-12, nahan ang buhay na walang hanggang ibinibigay sa atin ng Diyos.
- .....

### Pagkilala ng Anak sa mga tagasunod

Matagal ng panahon bago pa tayo ipinanganak, tayo'y kilala na ni Jesus. Bago pa itinatag ang sanlibutan, binalak na ng Diyos Ama, Anak, at Espiritu Santo ang panukala nila para sa sangkatauhan. Nilikha nila tayo na kalarawan ng Diyos, itinuring 'na mga Anak ng Diyos na lumalasap ng kanyang pag-ibig at ng mga bagay na inihanda para sa atin, at buong ligayang namumuhay na kasama ng Diyos.

Nguni't may nakita pang isang bagay ang Diyos, nakita niyang tatalikdan Siya ng mga tao at pipiliin ang landas ng kasalanan at kamatayan. Tayo'y nakita ng Diyos na naghihirap bunga ng kasalanan at nasa ilalim ng hatol na kamatayan. Bagama't masuwayin tayo at walang turing, inilibig Niya tayo nang gayon na lamang. Binalak ng Ama, Anak, at Espiritu Santo ang paraan tungo sa ikaliligtas natin.

Kahit makasalanan pa tayo, tayo'y pinili ng Anak ng Diyos upang maging mga tagasunod Niya. Nakita Niya ang ating kasalanan at inako niyang mamatay kapalit natin. Nakita Niya ang ating kahinaan at pinalitan ng kalakasan. Tinanggap niya ang lahat ng lumalapit sa Kanya at pinalalaya sila sa kapangvarihan ng kasalanan.



**Efeso 1:4-5.** At sa atin ngang pakikipag-isang ito, hinirang na niya tayo bago pa nalikha ang sanlibutan, upang maging banal at walang kapintasan sa harapan niya. Dahil sa pag-ibig ng Diyos, tayo'y kanyang itinalaga upang maging mga anak niya sa pamamagitan ni Jesu-Cristo. Iyan ang kanyang layunin at kalooban.

Ang mga pangalang ginamit ni Jesus para sa kanyang mga tagasunod noong Siya'y narito sa lupa ay naghahayag ng pag-ibig Niya sa lahat ng sumusunod sa Kanya. Tinawag Niya silang mumunting mga anak, mga anak ng Diyos, ilaw ng sanlibutan, asin ng sanlibutan, ikakasal sa kanya, mga saksi, yaong ibinigay sa Kanya ng Diyos, kawan ng tupa, mga hinirang, Kanyang iglesya, mga kapatid, bahagi Niya bilang mga sanga ng puno ng ubas.

Kinikilala ba natin si Jesus na ating Tagapagligtas at Panginoon? Kung gayon, tayo'y kinikilala rin Niya na para sa Kanya.

**Mateo 10:32-33.** Ang sinumang kumilala sa akin sa harapan ng mga tao ay kikilanlin ko rin naman sa harapan ng aking Amang nasa langit. Nguni't ang magtatwa sa akin sa harapan ng mga tao ay itatatwa ko rin naman sa harapan ng aking Amang nasa langit.

**Juan 1:12.** Ang lahat ng tumanggap... nananalig sa kanya ay pinagkalooban niya ng karapatang maging anak ng Diyos.

### Ang Gagawin Mo

8. Piliin mo sa Efeso 1:4-5 ang mga salitang tumutugon sa mga katanungang ito:

a) Kailan tayo pinili ng Diyos? . . . . .

. . . . .

b) Ano ang pinili ng Diyos para sa atin? . . . . .

. . . . .

k) Ano ang ibubunga nito? . . . . .

. . . . .

d) Bakit ibig ng Diyos na mailapit tayo sa kanya? . . . . .

. . . . .

e) Sa anong paraan tayo nailapit ng Diyos sa Kanya? . . . . .

. . . . .

g) Ano ang layunin at kalooban ng Diyos? . . . . .

. . . . .

9. Ano ang itinawag ni Jesus sa kanyang mga tagasunod? Ilista ang 5 ng mga pangalang natatandaan mo. Pagkatapos, tingnan mo ang aklat para matapos mo ang iyong talaan nito. Lagyan ng tanda yaong nais mong itawag sa iyo ni Jesus.

. . . . .  
. . . . .  
. . . . .  
. . . . .

### Walang hanggang kaisahan ng Anak at ng mga tagasunod

Nais ni Jesus na makasama Niya tayo pagka't tayo'y kanyang iniibig at alam Niyang nasasalig sa pakikiisa natin sa Kanya ang ating kaligayahan, buhay, at hinaharap. Bini-bigyan Niya tayo ng bagong buhay para sa katawan, kaluluwa, at espiritu. Sa Kanya tayo makasusumpong ng tunay na kaligayahan, katuparan, at kapangyarihan para magtagumpay sa kasamaan. Lahat ng mamumuhay sa Kanya sa araw-araw ay mamumuhay na kaping Niya magpakailanman doon sa langit. Sabi ni Jesus:

**Juan, 10:10.** "Naparito ako upang ang mga tupa'y magkaroon ng buhay — isang buhay na ganap at kasiya-siya."

**Juan 14:6....** "Ako ang daan, ang katotohanan, at ang buhay. Walang makapupunta sa Ama kundi sa pamamagitan ko."

**Juan 3:35-36.** "Minamahal ng Ama ang Anak, at ibinigay sa kanya ang lahat ng bagay. Ang nananalig sa Anak ay may buhay na walang hanggan: nguni't ang hindi tumatalima sa Anak ay hindi magkakaroon ng buhay — mananatili sa kanya ang poot ng Diyos."

Napakalapit ng kaugnayan natin kay Jesus anupa't lahat ng nananalig sa Kanya ay na kay Cristo at Siya naman ay nasa atin. Siya ang puno ng ubas; at tayo ang mga sanga.



**Juan 15:5.** Ako ang puno ng ubas, kayo ang mga sanga. Ang nananatili sa akin at ako sa kanya, ang siyang namumunga nang sagana; sapagka't wala kayong magagawa kung kayo'y hiwalay sa akin.



Inilalarawan ni Pablo ang ating kaisahan kay Cristo bilang mga sangkap ng Kanyang katawan. Si Jesus ang ulo. Ang kanyang iglesya ay Siyang katawan. Ang lahat ng mga karapatan ng walang kasalanang Anak ng Diyos, lahat Niyang kayamanan sa kaluwalhatian, lahat ng pag-ibig at samahang namamagitan sa Anak at Ama ay atin din bilang mga sangkap ng kanyang katawan.

**Colosas 1:17,18,27,28.** Siya'y una sa lahat, at sa kanya nasasalalay ang kaayusan ng lahat ng bagay. Siya ang ulo ng iglesya na kanyang katawan. Siya ang Una, ang panganay na Anak — ang unang nabuhay na muli upang siya ang maging pinakadakila sa lahat ng bagay. Sumainyo si Cristo at dahil dito'y nagkaroon kayo ng pag-asang makapiling ng Diyos doon sa kaluwalhatian. Iyan ang dahilan kung bakit namin ipinangangaral si Cristo . . . upang maiharap namin sa Diyos ang bawa't isa, sakdal at walang kapintasan dahil sa pakikipag-tisa kay Cristo.

### Ang Gagawin Mo

10. Isaulo mo ang Juan 10:10 at 14:6.
11. Anong tatlong bagay ang sinasabi ni Jesus tungkol sa Kanyang sarili sa Juan 14:6 . . . . .
12. Tingnan mo kung ilan ang nasagot mo nang tama

Markahan ang iyong mga sagot.

### Ika-3 Aralin -- Mga Sagot

Ang mga tanong ay humihingi ng 33 sagot. Kung 29 hanggang 33 ang nasagot mo nang tama, ilagay na antas ang napakahusay; mula 21 hanggang 28 ay mabuti; 16 hanggang 20 ay katamtaman. Kung kulang sa 16 ang tama, basahin mo uli ang aralin.

1. a) Isaias, b) Mikas, k) Elohim, d) Trinidad, e) Juan, g) Jesus, h) Esteban.

3. Ama.

5. (Ang bawat isa ay tigatlong sagot)

a) Mga anghel ay lumitaw: Kay Jose, Maria, sa mga pastol, kay Jesus, sa libingan, at pag-akyat Niya sa langit.

b) Espiritu Santo: nangusap sa pamamagitan nina Elizabeth, Zacarias, Maria, Ana, Simeon, Juan Bautista; bumaba kay Jesus bilang isang kalapati; binigyan ng kapangyarihan at karunungan si Jesus.

k) Di pangkaraniwang mga tanda: bituin, tinig mula sa langit, mga himala ni Jesus, pagbabagong-anyo, lindol, kadiliman, nahating tabing, muung pagkabuhay, pag-akyat sa langit, nakita sa langit si Jesus, mga himala bilang tugon sa panalangin sa kanyang pangalan.

6. d) Ang Ebanghelyo ni Juan.

7. Sa Kanyang Anak.

a) Bago pa nilikha ang sanlibutan.

b) Na maging Kanya tayo sa pamamagitan ni Cristo.

k) Tayo'y magiging banal at walang sala sa sa kanya.

d) Dahil sa Kanyang pag-ibig.

e) Sa pamamagitan ni Jesu-Cristo.

g) Na ilapit tayo sa Kanya bilang mga anak.

9. Lima nito: Mumunti Niyang mga anak, mga anak ng Diyos, ilaw ng sanlibutan, asin ng sanlibutan, ikakasal sa Kanya, mga saksi, yaong ibinigay sa Kanya ng Diyos, munting kawan ng tupa, Kanyang hinirang, Kanyang iglesya, mga kapatid Niya, bahagi Niya bilang mga sanga ng puno ng ubas.

11. Ang daan, ang katotohanan, ang buhay.

Bilang ng mga tamang sagot . . . . . Antas . . . . .